



Tanggal 22 Februari 2009, Majlis Perwakilan Pelajar sesi 2008 & 2009 dengan kerjasama Majlis Penghuni Kolej Kediaman telah menganjurkan program Sambutan Tahun Baru Cina bagi tahun 2009 bertempat di Dewan Capitol, UniMAP. Program sambutan ini merupakan acara tahunan anjuran pelajar di mana pihak Universiti memberi sokongan padu dalam penganjurannya. Sambutan Tahun Baru Cina melambangkan penyambutan satu permulaan yang baik bagi setahun yang akan datang. Tema Sambutan Tahun Baru Cina pada kali ini adalah "Reminiscing The Spring Blossom" yang membawa maksud pada setiap Tahun Baru Cina akan jatuh pada musim bunga dan setiap kali musim bunga ini berbunga, ini bermaksud Tahun Baru Cina akan datang. Bunga-bunga ini amat disukai oleh golongan muda mahupun orang tua kerana bunga ini membawa makna yang mendalam. Bagi orang muda mereka akan merasai perasaan yang sangat gembira kerana setiap kali musim bunga ini datang, mereka akan menerima angpau dan berpeluang berkumpul dengan seluruh ahli keluarga masing-masing. Manakala orang tua amat mementingkan musim bunga kerana bunga-bunga akan membawa maksud semua ahli keluarga akan bersatu dan beramah mesra sesama ahli keluarga.

Kemeriah program diserikan lagi dengan kehadiran Y. Bhg. Dato' Naib Canselor UniMAP, Brig. Jen. Dato' Prof. Dr. Kamarudin Hussin yang sekaligus merasmikan program Sambutan Tahun Baru Cina. Malahan Y. Berusaha Dr. Por Choo Chor, wakil MCA Perlis turut hadir ke program ini sebagai tanda sokongan terhadap kesungguhan mahasiswa UniMAP menganjurkan sambutan perayaan yang begitu bermakna kepada masyarakat Cina. Dalam ucapan perasmian Y. Bhg. Dato' Naib Canselor, kejayaan penganjuran program seperti ini membuktikan bahawa mahasiswa UniMAP begitu mementingkan perpaduan dan persefahaman antara kaum di mana hasilnya dengan wujudnya situasi perpaduan yang utuh di dalam kampus sudah pasti akan mengundang keharmonian dan keselesaan pembelajaran yang terjamin. Para mahasiswa UniMAP juga berpeluang mengenali tradisi dan budaya masyarakat Cina dengan lebih dekat dan wujud perasaan hormat terhadap adab resam masyarakat majmuk di Malaysia. Program ini turut disertai oleh pelajar-pelajar sekolah menengah dan rendah dan orang awam sekitar Kangar, Perlis. Pelbagai aktiviti yang menarik dan persembahan kebudayaan dari kaum Melayu, Cina dan India telah berlangsung pada malam tersebut.

Sambutan Tahun Baru Cina 2009

Merealisasikan Hasrat UniMAP Juara Perpaduan

Oleh : Fazlina Md. Fadzil